

04/04/2001

Rakyat diajak kekalkan kerjasama

KUALA LUMPUR, Selasa - Datuk Seri Dr Mahathir Mohamad mengajak rakyat mengekalkan kerjasama istimewa pelbagai kaum yang diilhamkan Baba Kemerdekaan, Almarhum Tunku Abdul Rahman Putra Alhaj.

Perdana Menteri berkata, sesungguhnya negara terhutang budi kepada pemimpin terulung itu kerana ilham Tunku Abdul Rahman turut menghasilkan formula kestabilan dan pembangunan ekonomi negara.

"Tunku Abdul Rahman yang mencipta kerjasama istimewa antara kaum yang pada hari ini cuba ditiru bukan saja di negara ini, malah juga di banyak negara membangun lain yang menghadapi masalah perkauman.

"Tanpa kehilangan identiti kaum, parti politik yang berasas kepada kaum dapat bergerak sebagai satu parti dan tidak sebagai parti campuran. Inilah formula yang menghasilkan kestabilan dan pembangunan ekonomi di Malaysia.

"Jika Malaysia ingin terus aman dan tumbuh dengan pesatnya, amat penting bagi mereka yang mengamalkan sistem yang unik ini dikekalkan berkuasa. Mereka yang meniru sistem ini tidak mungkin menghasilkan hasil yang sama," katanya ketika membentangkan Rangka Rancangan Jangka Panjang Ketiga (RRJP3) di Dewan Rakyat hari ini.

Dr Mahathir berkata, amat malang pengasas pengamal kerjasama antara kaum ini sedang menghadapi politik membenci, penyelewengan agama, sikap perkauman yang tebal dan rusuhan jalanan.

Katanya, amat sukar memahami mengapa rakyat di Malaysia yang aman dan pesat membangun, ingin meniru cara negara yang tidak berjaya untuk kekal aman dan maju.

Hakikatnya, kata beliau, ada golongan yang tidak senang hati melihat negara ini aman serta ekonominya berkembang maju dan mereka ingin melihat kekecohan dan keganasan, kecederaan bahkan pembunuhan.

"Mereka sentiasa mencari isu dan peristiwa untuk dieksploitasi. Sementara mereka bercakap mengenai demokrasi, mereka tidak sanggup menerima keputusan majoriti rakyat. Mereka tidak sanggup menunggu pilihan raya tetapi ingin merebut kuasa secara haram.

"Baru-baru ini tercetus perkelahian di antara beberapa orang Melayu dan India. Dengan serta-merta, ada pihak yang cuba menghasut supaya kedua-dua kaum menghancurkan keamanan yang dinikmati negara," katanya.

Dr Mahathir berkata, umum mengetahui ada individu tertentu yang ingin melihat kerajaan dijatuhkan menerusi keganasan jalanan dan ini diperakui oleh mereka sendiri kepada pihak asing yang bersimpati dengan mereka.

Tetapi kerajaan, katanya, tidak akan teragak-agak untuk menguatkuasakan undang-undang sekali pun dikutuk oleh media asing dan pihak asing tertentu.

Katanya, kesejahteraan Malaysia adalah tanggungjawab rakyat Malaysia dan kerajaan yang dipilih.

"Kita sudah menunjukkan bahawa apabila kepentingan Malaysia tercabar, kita sanggup menentang arus atau apa yang dikatakan sebagai norma antarabangsa. Kita tahu bahawa pengkritik kita bukanlah malaikat dan apabila ia secocok dengan kepentingan mereka, mereka akan mengetepikan segala prinsip dan kebenaran.

"Oleh itu jika keamanan dan kestabilan negara ini terancam, walaupun pihak tertentu mendapat sokongan rakan asing terhadap tindakan haram mereka, mereka tidak akan selamat daripada penguatkuasaan undang-undang Malaysia.

"Kerajaan akan bertindak dan bertindak dengan tegas untuk menyelamatkan

negara ini daripada manipulasi pihak asing dan proksi mereka," katanya.
(END)